



Synfocity = 701

mail us at : mzsynfo@gmail.com; mizoramsynod@gmail.com - Phone - 2314648

September 6, 2018

□ SEC wawi 274-na an ðu

Wawiin (Sept. 6) hian Synod Executive Committee (SEC) wawi 274-na chu Synod Moderator Rev. F. Lalrinnunga kaihhuaiin Lloyd Hall-ah an ðu a. Synod Secretary (Sr.) Upa R. Dengzikpuian report a pe a. Tun ðum SEC-ah hian thurel tur chhawpçhuah 18 a awm a, chung zingah chuan Synod Pay Commission Report 2018 thlirhona, Vijayanagar, Arunachal & Assam Field East-a rawngbawl na kalpui zel dan tur, Hmangaihna In Firms & Society register chungchang, Bawngkawn Synod rama Hall lian (Rev. William Williams Building) hman dan tur ruahmanna, Myanmar rama Ramthar rawngbawl dan tur ruahmanna leh Damdawia enkawl na leh puihna dang chungchang te a tel.

Rorel zawhah Beihruul kum 100 tlin (centenary) hriat rengna thuziak (tablet) hawnna programme Synod Office tual zawlah hman nghal a ni. Beihruul Kum 100 tlin hriat rengna thuziak hawn hman in Synod Secretary (Sr.) Upa R. Dengzikpuian kamkeu-na thu a sawi a, Synod Moderator Rev. F. Lalrinnungan a hawng a ni.

□ Naupang Sunday School Inkhawmpui

Sept. 9, 2018 (Pathianni) hi Naupang Sunday School Inkhawmpui Ni a ni a, Presbyterian Kohhran hnuaia Bial leh Kohhran hrang hrangah Naupang Inkhawmpui hi hman a ni ang. Naupang Inkhawmpuia hian Sunday School naupangte chu Pathian thu chang sawirualah te, hla sakah te, thu inchhang sawiah te inelna neih a ni ang a. Heng bakah hian naupangten item hrang hrang a remchan dan angin an nei baw k ang.

A tirah chuan Naupang Inkhawmpui hi Missionary-te ðhahnemngaihna avanga neih ðan a ni a. Kum 1931 khan Aizawl Tlangnuam Kohhranah neih a ni a, hei hi Naupang Inkhawmpui hmasa ber ni-a hriat a ni.

Tunhma lam chuan Naupang Inkhawmpui hi Bial hrang hrangin an remchan hunah an nei mai ðin a, tun hnai deuh atang khan Bial tinte an kalruul theih nan MSSU chuan Sunday School Zirlai Syllabus-ah Naupang leh Senior Inkhawmpui hun tur an ruahman tel ve ta a ni. Senior Department Inkhawmpui chu Sept. 16, 2018 (Pathianni)-ah neih a ni ang.

Kum 2017 inchhiarna MSSU dinhmun hetiang hi a ni:

Sunday School zat	: 963
Hotute	: 4,494
Zirtirtu	: 47,116
Zirlai	: 3,82,183
TOTAL	: 4,34,756

□ Sùna : Missionary Nl. Lalthanzuali, kum 52 kan chan ta

Nl. Lalthanzuali hi Sept. 24, 1966 khân Champhai Project Vengah a piang a. Pu Duhvea (L) leh Pi Kapzawni (L) te fa pariat zînga parukna a ni a.

Nl. Zualtei hi thiamna lamah B.A. a ni a. B.A. a zawh hnu hian Electric Department-ah rei lo tẽ a thawk a. Kum 1991 khân a hna a bansan a, a pa thawhna - St. Peter English Medium School, Madhuripathar-ah missionary hna a thawk ta zâwk a ni.

Madhuripathar hmuna a thawh lai hian a thawhpui - Tv. Vanlalchullova Pachuau, Nl. Laldawngliani Zote leh Mizoram aþanga anmahni tlawhtu tlangval pahnihte nen Monigaon, Arunachal Pradesh-ah rawngbâwlin an feh chhuak a, he khua leh a chhehveþ aþangin mi 57 laiin Lal Isua ringin, Upa Tomsen Khandu kutah baptisma an chang hlawm a. Chu chu duh lovin, ringlo hovin Police hnẽnah an hek a. Monigaon Jail-ah hian hun eng emaw chen an táng a. Hetih hun laia Arunachal & Assam Mission Field Secretary, Rev. K. Lalthangmawia hma lâkna azârah rei erawh an táng ta lo a ni. Missionary hna a thawh chhung hian Field hrang hrangah a awm a, January 2018 aþanga a thih ni thlengin Masihi Sangati Kendra Office, Bawngkawnah a awm ta a ni.

May 2018 aþang khân chaw a ei thei lo ðan a. July 19, 2018 khân a khawsik avângin Synod Hospital, Durtlangah a inentîr a; an lo admit nghâl a. Hetah hian investigation te tiin, a natna hi Chuap leh ruh Cancer a ni tih hriat chhuah a ni a. Damdawi In aþanga chhuak tawh lovin enkawl chhunzawm nghâl a ni a. A natna hi a lo nasa tawh viau mai a; tin, a BP a mumal lo baw k nen, chemo pawh khaisak a ni ta lo a ni.

A natna hi lo zual zelin, August ni 30, 2018 zîng dâr 7:30 khân Chatuan ram min pansan ta a ni. Hemi ni vek hian Rev. K. Lalrinmawia, Secretary, Synod Mission Board chuan Bethlehem Venga a ð, Pu J. Lalthlamuana inah a vui a ni.

Nl. Lalthanzuali hi Synod Lay Workers Fellowship chuan Sept. 7, 2018 (Zirtawpni) hian Bethlehem-ah ralna hun an hmang dawn a ni.

Contd..

- **Sûna : Pu Zorema (David Royce Edwards), kum 83 kan chan ta**
 Aug. 31, 2018 (Zirtawpni) zing dar 4:00 khan Pu Zorema (David Royce Edwards) kum 83 chu Emral House Nursing Home, Wrexham khuaah Vascular Dementia natna avangin a thi a. A ni hi Pi Zosiami (Dorothy Mair Edwards) July 12, 2018 a vui liam tak pasal kha a ni. Presbyterian Church of Wales missionary Rev. David Edwards (Pu Edward-a) fapa a ni a, Mizorama missionary fa piang hmasa ber a nih bakah a nupui Zosiami nen hian Mizorama Welsh missionary fate innei awm chhun an ni. A pa Rev. David Edwards kha "Zorema Pa" tia hriat a ni thin a, zirna school leh Bible lehlinaa mi ñangkai tak a ni a, Young Lushai Association (YLA/YMA) dintute zinga mi niin Treasurer hmasa ber a ni nghe nghe.
 Pu Zorema hi Sept. 13, 2018 (Ningani) zing karah chhungkaw bilin a vuina hun an hmang ang a, chumi hnu dar 10:30 (India rama tlai dar 3:00)-ah an lawina Kohhran Capel Y Groes, Wrexham-ah Thanksgiving service an nei zui ang.
- **Synod Mission Board**
- ♦ Sept. 7 - 18, 2018 chhung hian Field hrang hrang Tripura, Karbi Anglong leh Assam Field-ah te Field Committee-in Rev. K. Lalrinmawia, Secretary, Mission Board leh BEC Member te - Rev. T.C Laltlanzova leh Upa Zairemmawia te an kal ang.
 - ♦ September 8 - 17, 2018 chhung hian Tripura Mission Field-a Mission School hrang hrangte tlawh turin Pu T. Lalchuangliana, Supervisor of Schools a kal ang.
- **KTP**
- ♦ Central Kristian Thalai Pawl chuan Sept. 5, 2018 (Nilaini) chawhnu dar 3 khan Hospital Charity Fund atan cheng nuai nga chu Synod Hospital, Durtlangah an pe.
 57th KTP General Conference Rorelah khan Hospital Charity Fund atan hian Thawhtanni zan inkhawm thawhlawm tum khat lak khawm ni se, ti-a rel a ni a. Mizoram hmun hrang hranga KTP Branch ten charity fund atana zan khat thawhlawm an lakkhawm atang hian a thawh khat nan Sept. 5, 2018, Nilaini chawhnu khan cheng nuai 5 chu Synod Hospital thuneitute hnenah an hlan.
 Hospital Charity Fund hi CKTP Leader Rev. Dr. K. Lallawmzuala chuan Synod Hospital Director, Dr. LH Thanga Singson hnenah a hlan a. Rev. Dr. K. Lallawmzuala hian KTP ten Synod Hospital hi an ngai pawimawh a, tih theih tam tak awm lo mah se, KTP ten an tih theih chinah chuan Synod Hospital hi an hre reng a, ñanpui an inpeih reng a ni a ti a. Synod Hospital, Durtlang bakah John Williams Hospital, Lunglei hmasawn zelna tur leh, mipuite tan belhfakawm a nih zel theih hi KTP member-ten an duh a, KTP General Conference Rorel Inkhawmah pawh sawi chhuah a ni a, agenda-ah hian rawn lut a ni a ti. Dr. LH Thanga Singson chuan KTP ten thahnem an ngai a, Synod rawngbawlna pawimawh taka hetiangâ thâ an thawh hi lawmawm a tih thu sawiin, Synod Hospital hi mi rethei ber thlenga an pan a ni a. Mi rethei tam tak, damdawi ina an inenkawlna senso nei lote tana KTP-in inphal taka thawhlawm an thawh chuan mi rethei tam tak, an awm man an pek theih loh avang leh an damlohna avanga rilru hah mekte tan damna a thlen ngei ang a ti.
 Synod Hospital Coordinator, Upa F. Lalsangliana chuan KTP te avangin kawng tam takin Synod Hospital hi a changtlung a, hma a sawn a, an neih theih loh tur thil tam tak an lo nei tawh thin a ni tih a sawi a. KTP te sum thawh khawm hmangin Mizorama endoscopy khawl hmasa ber pawh Synod Hospital hian an neih theih phah a, a hmun laih, buk leh thil tul dang hrang hrangah, thisen pek leh mi rethei chhawmdawl thlengin, hman atanga tun thlengin KTP chu Synod Hospital tana ñangkai leh chhuanawm an la ni reng a ni, a ti bawk.
 - ♦ Mizoram Synod hnuai HIV/AIDS avanga harsatna tawkte enkawlna hmun, Durtlanga Grace Home chu Sept. 5, 2018 (Nilaini) khan CKTP Leader, Rev. Dr. K. Lallawmzuala hovin CKTP hruaituten an tlawh bawk a.
 Grace Home hi Presbyterian Church of Wales leh sapram atanga ñanpuina hmuh atanga sak leh din a ni a, CKTP chuan he hmun din nan hian cheng nuai 2.2 lai a thawh a. Hei bakah tun thlengin chaw chhûmtu hlawh tur eng emaw zat a tumsak bawk.
 Grace Home-a thawktute nen titihona hun hman a ni a, Grace Home hmalak dan leh tuna an dinhmunte sawiho a ni. HIV/AIDS avanga damlo, inenkawlna nei lote hi Grace Home-ah enkawl a ni a. Mi 20 lai awm theihna a ni a, mi 10 bawr vel awm an awm reng a, heng damlote hi nurse leh doctor-ten an thutchilh reng a ni. Grace Home pantute hi mi rethei, HIV/AIDS avanga harsatna taw, mahnia inenkawlna tur tha nei lote an ni ber.
- **Revival Deptt.**
 Sept. 11 - 15, 2018 chhung hian Synod Revival Camping Center, Neibawihah a duh apiang tan Camping buatsaih leh a ni dawn a. Speaker tur chu Pu Lalhriatkima, Kross Hnehna Puangtu Team a ni ang. Camping Fee Rs. 100/- mi pakhat tan a ni a, Mut bu bakah Bible, Hla bu, Pen, Note bu ken tur a ni. Camp neihna hmun Neihbawih-ah Chhun dar 11:00 atanga tlai dar 4 inkarah Registration tih fel vek tur a ni a, rokhawlhna lian tak nei an nih loh chuan tlai dar 4:00 hnu lamah in-register theih a ni lo ang. Tun tum camp-ah hian mawhpur turin Venghlui Pastor Bial ruat an ni.

❑ **Praise On 2018 Organizing Committee an th̄u**

Sept. 5, 2018 (Nilaini) khan Synfo Praise On 2018 Organising Committee chu Synod Committee Room No.1-ah Chairman Upa Zonunmawia kaihhruaiin an th̄u khawm a. Praise On 2018 atana hmalaknate th̄lir hovin ruahmanna hrang hrang an siam zui bawk. Organising Committee th̄utkhawm ni thleng hian Intihsiaknaa tel tur Branch hrang hrang aṅangin 40 velin hming an pe tawh a ni. Synfo Praise On 2018 Intihsiakna hi Mission Veng Kohhran Hall-ah neih a ni dawn a. September 18 -21 chhungin Round 1 neih a ni ang a, October 16 -19 chhungin Round 2, November 6 -9 chhungin Round 3 leh Final round neih a ni ang. Praise On 2018 Hlanna inkhawm hi September 14 (Zirtawpni) zan dar 8:45-ah Mission Veng Kohhran Hall-ah neih a ni dawn a, Synod Moderator Rev. F. Lalrinnungan a hlan ang a, Judge turte puan chhuahna leh inhmelhriattirna neih a ni ang a, Mizoram Synod Choir, Praise On 2017-a lawmman pathumna latu Dawrpui Vengthar Group leh Praise On 2016 House Band te an zai ang.

❑ **Synod Relief Fund**

Tun hnaia harsatna hrang hrang neite hnenah Synod Relief Fund atangin chhawmdawlina hetiang hian pek an ni.

S.No	Khua	Pek chhan	Chhungkaw zat	Chhawmdawlina pek zat
1.	Tuipuibari Venghlun KH	Thlipui tuar	-	Rs. 20,000/-
2.	Tuidam	Damlo	1	Rs. 8,000/-
3.	Thentlang	Damlo	1	Rs. 8,000/-
			TOTAL	Rs. 36,000/-

❑ **Trust**

Sept. 6 & 7, 2018 hian Pukzing-ah Pastor Quarters Renovate enpuuin Pu Lalhriatrenga, J.E a kal.

❑ **Campus Ministry**

Sept. 4, 2018(Thawhlejni) khan Govt. Aizawl College-ah hun an hmang a, Sept . 6, 2018(Ningani) khan Govt. Aizawl West College-ah hun an hmang leh ang.

❑ **Prison Ministry**

Sept. 9, 2018(Pathianni) hian District Jail-ah hun an hmang ang a, Rev. R. Lalvulluaia, i/c Prison Ministry leh ITI Branch KṬP te an kal ang.

❑ **Hruaina Eng FM Radio**

♦ **SEPTEMBER 7, 2018 (FM Zoawi Aizawl & FM Lunglei @ 7:30 p.m.):**

Zaipawl : Mizoram Synod Choir - Krista leh Kohhran tan, Solo : Fred Lalhlimpua - Halleluiah, Thusawi : John Lalhruaitluanga - Thianghlimna, Zaipawl : Kulikawn pastor Bial Zaipawl - Pathian anghhung, Duet : Chris M.S Dawngkima leh Laldusaki - Thola Eng Rawh

❑ **Hruaina Eng TV Programme**

Susamachar Prasaran Programme

♦ **SEPTEMBER 9, 2018 (Pathianni) 5:00 pm. :**

Group/Choir/Solo : The Leprosy Mission Choir - Ham Soup Te He, Group/Choir/Solo : Durtlang Masihi Sangati - Halleluiah Chorus, Sermon : Rev. P.C. Rohlira, Group/Choir/Solo : PC Lianhmingthanga - Ye Dharti, Group/Choir/Solo : H.Vanlalringa - He Mere Man

♦ **SEPTEMBER 9, 2018 (Tv Programme) @ 4:00 - 6:00, 8:00 - 9:00 p.m) :**

Sermon : Rev. C. Lianhmingthanga - Dam chhung ni chhiar dan
Weekly Round Up
MSVT KṬP : Hostellers' Night

❑ **Moderator Programme**

Sept. 8 & 9, 2018 Inrinni & Pathianni Kolkata Kohhran

Kohhran Pavalai Pawl Flag leh Logo (Emblem) chungchang hriattirna

Kohhran Pavalai Pawl Logo leh Flag chungchanga rawtna hrang hrang aṅangin Revival Committee chuan a thlang fel ta a. Thehluh zing aṅang hian Tv. Vanlalruata leh Upa K. Lalhunpuia, Durtlang North a mite buatsaih chu tlema siam remin thlan a ni a. A duh apiang tan Logo hi Synod Official Website lamah download theiha dah a ni a. Tin, Flag hi LA Garment, Chanmari-ah a duh apiangin mahni Kohhran hming emaw Pastor Bial hming nena chhut lan turin order theih a ni ang. LA Garment nen hian Agreement sign a nih angin Flag hi man tlawm zawkin a print tir theih dawn a, size pangngai Rs. 550/- a ni ang a, Car Flag Rs. 30/- a ni ang. Anni hi Chanmari YMA Hall hnuaiah an awm a, a duh tur chuan an Phone no. 9774395219 -ah emaw 2348248 ah te biak pawh mai tur a ni. Tin, Inkaihhruaina Bu pawh lam theih turin peih a ni tawh a. Revival Office-ah bu khat Rs. 5/- in lam theih a ni ang. Hre chiang duh chuan Synod Revival Office-ah zawhfiah theih a ni e.

SYNOD SOCIAL FRONT HRIATTIRNA

1. Synod Charity Store

Synod Social Front chuan Synod thu bawhzuiin chungkaw neining zawkten an thuamnaw leh bungrua la hman tlak si, an hman tangkai tawh lem loh te leh an thil neih remchang apiang an thehkawm a, mi harsa zawkten an lo hman tangkai theih dan tur kawng a ngaihtuah a. Chumi atan chuan Synod Charity Store, Zosapthara Building, First Floor (MS-II/25&26) Mission Veng-ah hawn a ni a. Synod Charity Store-a dah tur hian thawnaw hak chi leh sin tur chi te, bungbel te leh lehkhawm te rawn thawh khawm turin Kohhran hrang hrangte a inchhawkin ngen thin an ni. Kohhranhote rawn thawhkhawm chu pakhat Rs. 100/- aia to lovin hralh ve thin a ni a, bungraw hlu bik deuh erawh chu Rs. 100/- aia tam deuh chhiar ve thin a ni bawk. Heng bungraw rawn thawhkhawm thenkhatte chu Ramthar Field lam te, Kohhran harsa deuh te leh chhiat tawk te hnenah a thlawnin pek thin an ni bawk.

Charity Store hi nitin, Synod office chawlh ni tih loh chu dar 9:00 A.M. - 5:00 P.M. hawn thin a ni a, Inrinni-ah dar 9:00 - 12:00 noon thleng hawn a ni bawk a, a mamawh apiang tan dawr theih reng a ni e.

2. Old Age Day Care Centre (Kum Upa te inkawmhlamna)

Synod Social Front chuan Old Age Day Care Centre (Kum Upa te Inkawmhlamna hmun) Synod Conference Centre, Ground Floor-ah kum lama upa tawh, thian kawm duh te kalkhawm a, an inkawmhlamna theihna tur a buatsaih a. Kalkhawmte tan infiamna turte leh lehkhawm chhiar tur te chhawpsak an ni a, an ei leh in turte ngaihtuhsak thin an ni bawk a. A remchan dan angin Pathian thu lama inkawmna te pawh neih thin a ni. Chawhma lam dar 10:30-ah Hunserh hmanpui thin an ni a, tlai lam dar 3:00 thleng hawn thin a ni. Old Age Day Care Centre-ah hian mi engemawzat an kalkhawmin an inkawm hlam thin a, mi thenkhat kalharsat deuh te chu an chungten an rawn hruai bawk thin. Heta kal awm mi kan hriat te chu kawhmuh thin turin kan inngen bawk e.

Executive Secretary
i/c Synod Social Front

Kohhran Pavalai Pawl (KPP) inkaihhraina



Kohhran Pavalai Pawl Flag leh Logo hrihfhahna.

1. Flag chungchang.

- 1) Kil li nei a ni ang.
- 2) A vang lam chu a dunglam hmun thuma thena hmun hnih (2/3) a ni tur a ni.
- 3) Rawng chi khat a ni ang a, a rawng atan rangkachak rawng (Creammy Gold Paint color) a ni ang a. Hei hian chungkuuaa pavalai te pawimawhna, hlutna leh thuneihna a entir a ni.
- 4) Flag laiah KPP Logo(Emblem) dah tur a ni a. Chumi hnuai lamah Kohhran/Pastor Bial hming hawrawp дума ziah tur a ni ang.
- 5) A hlai zawng chu chi thuma siam theih a ni ang a. A hlai Ber chu khaikhawmtu committee flag a ni ang a, Ft. 4x6 a ni ang. A dawttu chu Pastor Bial leh Kohhran mal flag a ni ang a, Ft 2.5x3.9 a ni ang. Tin, motora tar leh tul danga hman atan te deuh zawk, 6Inch.x9 Inch. a siam tur a ni ang.

2. Logo (Emblem) chungchang.

- 1) Logo hi size hrang hranga siam theih a ni ang a, a pian hmang erawh tihdanglam loh tur a ni ang.
- 2) Rin bial siamna, a tlang a дума rin chung hi rawng dum pawl hman tur a ni.
- 3) Rin bial chung bik background hi gray colour hman tur a ni ang.
- 4) Thuro thlawk lai hian Thlarau Thianghlim kan zinga thawk a, min hmu rengtu leh tiharh thar thintu a nih a entir.
- 5) Biak In leh Kraws hian Kohhran leh a rawngbawlna a ngaih pawimawhzia a entir.
- 6) Bible in keu leh meialh hian Pathian thua inngat chung zela chungkaw maichama mei chu a mit tur a ni lo tih a entir.
- 7) Rin bial in zawm lohna laia bial pathum awm hian Kohhran Pavalai te thil tum pathum a entir.
- 8) Rin bial hnuai lamah hian Logo neitu chu Kohhran Pavalai Pawl a ni tih tarlan a ni a. Ribbon a thangchhuah diar hman hian Krista tana thangchhuah tur kan ni tih a entir.
- 9) Rin bial chung chung lama Thlarau Thianghlim entirna Thuro chung a KPP thupui ziah hian Thlarau Thianghlim puihnaa Krista tana nung tur kan ni tih a entir.